

III. OUTRAS DISPOSICIÓNS

CONSELLERÍA DE CULTURA, EDUCACIÓN E ORDENACIÓN UNIVERSITARIA

ORDE do 6 de xuño de 2014 pola que se autorizan proxectos experimentais de formación profesional dual de ciclos formativos de formación profesional en centros educativos en colaboración con diversas entidades.

A Consellería de Cultura, Educación e Ordenación Universitaria pretende fomentar a colaboración das empresas no desenvolvemento da formación profesional do sistema educativo, co obxecto de adecuar as ensinanzas dos ciclos formativos ás necesidades específicas de formación que demandan as empresas.

O Real decreto 1529/2012, do 8 de novembro, polo que se desenvolve o contrato para a formación e a aprendizaxe e se establecen as bases da formación profesional dual, regula, entre outras cuestións, determinados aspectos da formación profesional dual, que combina os procesos de ensino e aprendizaxe na empresa e no centro de formación.

A disposición adicional segunda do Decreto 114/2010, do 1 de xullo, polo que se establece a ordenación xeral da formación profesional do sistema educativo, determina que a consellería con competencias en materia de educación promoverá a colaboración coas empresas e as entidades empresariais e, en particular, coas máis implicadas en sectores clave da economía galega e as relacionadas cos sectores emerxentes. Esta colaboración ten como finalidade, entre outras, a posibilidade de impartir módulos profesionais incluídos en títulos de formación profesional ou módulos formativos incluídos en certificados de profesionalidade nas instalacións das empresas, co fin de garantir que a formación se realice cos equipamentos propios da actividade, así como a actualización profesional.

A Orde do 12 de xullo de 2011 regula o desenvolvemento, a avaliación e a acreditación académica do alumnado das ensinanzas de formación profesional inicial.

Na súa virtude, co fin de pór en funcionamento proxectos de formación profesional dual de carácter experimental en colaboración con diversas entidades, a Consellería de Cultura, Educación e Ordenación Universitaria, facendo uso das competencias que lle confire o artigo 34.6 da Lei 1/1983, do 22 de febreiro, reguladora da Xunta e da súa Presidencia,

DISPOÑO:

Artigo 1. Obxecto

1. Esta orde ten por obxecto a autorización e a implantación de proxectos experimentais de formación profesional dual de ciclos formativos de formación profesional polo réxime



de persoas adultas en centros educativos en colaboración con diversas entidades. Estes proxectos combinan os procesos de ensino e aprendizaxe na empresa e no centro de formación. O Fondo Social Europeo cofinancia nun 80 % os gastos de funcionamento e de profesorado.

2. A relación de centros educativos, ciclos formativos e entidades colaboradoras en que se autorizan os proxectos de formación profesional dual establécese no anexo II.

3. A distribución de módulos para cada ciclo formativo e curso escolar establécese no anexo III.

Artigo 2. *Requisitos das persoas solicitantes*

Para poderen acceder a este proxecto de formación profesional dual, as persoas aspirantes deberán cumprir o seguinte:

a) Ter entre dezaseis e vinte e nove anos no momento de inicio do programa formativo, no caso dos ciclos de grao medio, e entre dezaioito e vinte e nove anos no caso dos ciclos de grao superior.

b) Cumprir os requisitos de acceso aos ciclos formativos establecidos no artigo 36 do Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, para poder matricularse en todos os módulos profesionais do ciclo formativo correspondente, e que se detallan no modelo de solicitude, no anexo I desta orde.

c) Carecer da cualificación profesional, obtida e recoñecida polo sistema de formación para o emprego ou do sistema educativo, requirida para concertar un contrato en prácticas para o posto de traballo ou a ocupación obxecto do proxecto.

d) Non ter realizado con anterioridade un contrato de formación e aprendizaxe, e cumprir os requisitos establecidos na normativa laboral vixente para poder efectualo.

e) Non ter superado ningún módulo profesional do ciclo formativo do proxecto solicitado, agás que fose cursando outro ciclo formativo.

Artigo 3. *Lugar e prazo de presentación de solicitude*

1. Cada solicitante presentará unha única solicitude, segundo o modelo do anexo I, que se entregará nun dos centros que figuran no anexo II e irá dirixida á dirección do centro educativo.



En caso de remitirse por correo, o envío deberá ser certificado, co selo de correos na primeira folia do formulario para garantir que a data de remisión sexa anterior á de pechamento da convocatoria.

Se a persoa solicitante presenta máis dunha solicitude ou solicita máis dun proxecto, non se terá en conta a súa petición.

2. Este modelo de solicitude estará dispoñible na Guía de procedementos e servizos, no enderezo <https://sede.xunta.es>, nas xefaturas territoriais da Consellería de Cultura, Educación e Ordenación Universitaria e na páxina web <http://www.edu.xunta.es/fp>

3. O prazo de presentación de solicitudes será desde o día 18 de xuño ata as 13.00 horas do día 27 de xuño de 2014.

Artigo 4. *Documentación*

Coa solicitude de admisión, anexo I, deberá xuntarse a seguinte documentación:

a) Copia do DNI ou NIE, no caso de non dar o consentimento para a comprobación dos datos de identidade no Sistema de verificación do Ministerio de Facenda e Administracións Públicas, de conformidade co artigo 2 do Decreto 255/2008, do 23 de outubro.

b) Certificación académica relativa aos requisitos de acceso, no caso de non ter realizado os estudos ou as probas de acceso no ámbito da Comunidade Autónoma de Galicia, ao abeiro da Lei orgánica 2/2006, do 3 de maio, de educación.

c) Currículo co formato Europass, que se poderá elaborar no enderezo:

<https://europass.cedefop.europa.eu/es/documents/curriculum-vitae>

Artigo 5. *Procedemento de admisión e matrícula*

1. O procedemento de admisión realizarase en dúas fases:

a) Na primeira fase, o centro educativo, logo de analizar a documentación presentada e verificar os requisitos das persoas solicitantes, fará pública no taboleiro de anuncios, no prazo máximo de dous días hábiles desde a finalización do prazo de presentación de solicitudes, a relación provisional de persoas solicitantes, ordenada alfabeticamente, con indicación do requisito de acceso ao ciclo formativo.



Esta publicación realizarase, así mesmo, na páxina web da Consellería de Cultura, Educación e Ordenación Universitaria <http://www.edu.xunta.es/fp>

Contra esta listaxe, o alumnado solicitante poderá presentar ante a dirección do centro a correspondente reclamación no prazo de dous días hábiles desde tal publicación.

Logo de resolver as reclamacións presentadas, no prazo de dous días hábiles desde a finalización do prazo de presentación de reclamacións, publicarase no taboleiro de anuncios do centro educativo e na páxina web <http://www.edu.xunta.es/fp> a listaxe coa relación definitiva de persoas solicitantes. Así mesmo, o centro educativo procederá na mesma data ao envío da dita listaxe á entidade colaboradora.

b) Na segunda fase, a entidade colaboradora, a partir da listaxe facilitada polo centro educativo e no prazo máximo de sete días hábiles, seleccionará as persoas para participar no proxecto de formación profesional dual, que non poderán exceder o número máximo de alumnado a que se refire o punto 1 do artigo 6 desta orde.

Para tal fin, e en virtude do convenio subscrito coa Consellería de Cultura, Educación e Ordenación Universitaria, a entidade colaboradora realizará as probas de coñecementos e capacitación profesional e as entrevistas psicoprofesionais para seleccionar as persoas candidatas que teñan o perfil que mellor se adapte ás características da actividade propia da empresa.

Finalizado o período de selección, o centro educativo publicará no taboleiro de anuncios a listaxe de persoas admitidas, a listaxe de persoas en espera ordenadas por orde de prioridade e a listaxe de persoas non seleccionadas.

Esta publicación realizarase, así mesmo, na páxina web da Consellería de Cultura, Educación e Ordenación Universitaria: <http://www.edu.xunta.es/fp>

2. No prazo máximo de dous días hábiles desde a publicación das listaxes a que se refire o punto anterior, as persoas admitidas deberanse matricular na secretaría do centro correspondente.

3. Contra a relación definitiva de solicitantes á que se refire o punto 1, alínea a), e contra as listaxes de persoas admitidas a que se refire o punto 1, alínea b), as persoas interesadas poderán interpor recurso de alzada, no prazo máximo dun mes, ante a persoa titular da xefatura territorial correspondente da Consellería de Cultura, Educación e Ordenación Universitaria.



Artigo 6. Prazas ofertadas e número mínimo de solicitudes de matrícula

1. O número máximo de alumnos e alumnas con matrícula no proxecto experimental de formación profesional dual será o establecido nos convenios subscritos entre a Consellería de Cultura, Educación e Ordenación Universitaria e a entidade colaboradora correspondente; en todo caso, será como máximo de vinte e dous alumnos/as por proxecto.

Os convenios poderán ser consultados no enderezo:

<http://www.edu.xunta.es/fp/convenios-dual>

2. A autorización da oferta do proxecto experimental de formación profesional dual quedará condicionada a que exista un número mínimo de doce persoas seleccionadas. Un número menor de persoas seleccionadas exige a autorización expresa da Dirección Xeral de Educación, Formación Profesional e Innovación Educativa para pór en funcionamento este proxecto experimental de formación profesional dual, e mentres non se dispoña desta autorización non se poderá formalizar matrícula ningunha.

Artigo 7. Obxecto e modalidade de desenvolvemento da formación profesional dual

1. Os proxectos experimentais de formación profesional dual desta orde realízanse consonte o establecido no Real decreto 1529/2012, do 8 de novembro, e teñen por obxecto a cualificación profesional dos traballadores e das traballadoras nun réxime de alternancia da actividade laboral nunha empresa coa actividade formativa recibida no marco do sistema educativo.

2. A actividade formativa inherente a estes proxectos será a necesaria para a obtención do título de técnico ou técnico superior correspondente, sen prexuízo de poder incluír formación complementaria para dar resposta tanto ás necesidades do alumnado como ás necesidades das empresas.

3. Estes proxectos de formación profesional dual desenvolveranse, consonte o establecido no artigo 3.1, alínea b), do Real decreto 1529/2012, do 8 de novembro, a través da modalidade de formación compartida entre o centro educativo e a empresa, que consiste en que a empresa facilite os espazos, as instalacións e/ou as persoas expertas para impartir parcialmente determinados módulos profesionais. No centro educativo, os módulos profesionais serán impartidos polo profesorado do corpo de catedráticos e catedráticas de ensino secundario, do corpo de profesorado de ensino secundario e do corpo de profesorado técnico de formación profesional segundo proceda, das especialidades establecidas no currículo correspondente.



Artigo 8. *Plan de formación e aprendizaxe*

1. Estes proxectos de formación profesional dual terán unha duración como máximo de tres anos e impartiranse de acordo coa distribución de módulos do anexo III para cada ciclo formativo e curso escolar.

2. Estes proxectos incorporarán, entre outros aspectos, a programación para cada un dos módulos profesionais consonte o establecido no artigo 23 da Orde do 12 de xullo de 2011 pola que se regula o desenvolvemento, a avaliación e a acreditación académica do alumnado das ensinanzas de formación profesional inicial, que recollerá as actividades que cumpra realizar no centro educativo e na empresa, así como o calendario, a xornada e os horarios en que se realizará a actividade laboral na empresa e a correspondente actividade formativa.

3. A distribución da formación curricular, a distribución global do proxecto, a temporalización dos módulos profesionais, a adquisición, por parte do alumnado, de cualificacións e unidades de competencia e a especificación das horas de formación que se realizarán no centro educativo e na empresa para cada módulo profesional están recollidas en cada un dos convenios subscritos entre a Consellería de Cultura, Educación e Ordenación Universitaria e a entidade colaboradora correspondente. Os convenios poderán ser consultados no enderezo <http://www.edu.xunta.es/fp/convenios-dual>

Artigo 9. *Titoría e desenvolvemento da formación*

1. A entidade colaboradora designará unha persoa como titor ou titora que, entre outras cousas, será responsable do seguimento da actividade formativa e da comunicación co centro de formación.

2. O centro educativo designará unha persoa como titor ou titora do grupo de alumnado que, ademais das funcións que se establecen no artigo 21 da citada Orde do 12 de xullo de 2011, será responsable da coordinación do equipo docente e será a interlocutora coa empresa para o desenvolvemento da actividade formativa.

3. A actividade formativa na empresa e no centro educativo será coordinada polos titores e as titoras mediante reunións de control cunha frecuencia mínima mensual, nas cales se realizará o seguimento de cada alumno ou alumna.



Artigo 10. *Avaliación*

1. A avaliación do alumnado será responsabilidade do profesorado dos módulos profesionais do centro educativo, tendo en conta as achegas das persoas expertas da empresa e o resultado das actividades desenvolvidas nesta. A valoración do grao de consecución dos resultados de aprendizaxe establecidos no currículo do ciclo formativo farase tomando como referencia inmediata os criterios de avaliación establecidos para cada módulo profesional.

2. Ao longo do período formativo correspondente, o profesorado de cada módulo realizará un seguimento do desenvolvemento do proceso de ensino e aprendizaxe de conformidade co artigo 23 da citada Orde do 12 de xullo de 2011, utilizando para iso os instrumentos e os procedementos de recolla de información previamente establecidos na programación dos módulos.

3. A avaliación de final de módulos de cada ano do proxecto corresponderase sempre co remate do período formativo dos módulos realizados no centro educativo e na empresa.

Artigo 11. *Módulo de formación en centros de traballo*

Ao finalizar o proxecto de formación profesional dual, o alumnado que superase todos os módulos profesionais do ciclo formativo correspondente que compoñen o proxecto, será eximido da realización do módulo de formación en centros de traballo.

Artigo 12. *Continuidade no proxecto de formación profesional dual por parte do alumnado*

1. Para poder continuar no proxecto de formación profesional dual, o alumnado seleccionado deberá superar a totalidade dos módulos profesionais do ciclo formativo correspondente previstos para cada curso académico segundo o plan de formación que se establece no anexo III desta orde. Non obstante, poderase continuar sen cumprir o anterior requisito por razóns debidamente motivadas e con autorización da Dirección Xeral de Educación, Formación Profesional e Innovación Educativa.

2. Así mesmo, o alumnado será excluído do proxecto de formación dual nos seguintes casos:

a) Por faltas repetidas de asistencia e/ou puntualidade non xustificadas.



b) Por actitude incorrecta, atendendo ao código disciplinario da empresa, ou por falta de aproveitamento.

c) Para o alumnado con contrato de formación e aprendizaxe, pola extinción do contrato por calquera das causas que se establecen no artigo 13 do Real decreto 1529/2012, do 8 de novembro.

3. A Consellería de Cultura, Educación e Ordenación Universitaria, segundo o artigo 32 do Real decreto 1529/2012, do 8 de novembro, articulará as medidas necesarias para que ao alumnado que non superase algún módulo, e non fose excluído do proxecto por algún dos casos recollidos nas alíneas a) e b) do punto anterior, se lle facilite a continuación das ensinanzas do ciclo correspondente.

4. O alumnado que cumpra as condicións para continuar no proxecto nos cursos seguintes terá praza garantida e deberá entregar a solicitude de reserva para cada curso académico no prazo ordinario de presentación de solicitudes de admisión establecido no artigo 11 da Orde do 5 de xuño de 2007 pola que se regula o procedemento de admisión do alumnado nos centros docentes sostidos con fondos públicos para impartir ciclos formativos de formación profesional de graos medio e superior, en réxime ordinario e para as persoas adultas.

Coa solicitude entenderase que o alumnado solicita a matrícula na totalidade dos módulos ofertados, segundo o plan de formación que se establece no anexo III desta orde. No último curso do proxecto, ademais destes módulos, o alumnado deberase matricular no módulo de formación en centros de traballo e, no caso dos ciclos de grao superior, no módulo de proxecto.

Artigo 13. *Módulo de proxecto dos ciclos formativos de grao superior*

Sen prexuízo do establecido na normativa reguladora do módulo de proxecto dos ciclos formativos de grao superior, este módulo profesional desenvolverase durante o derradeiro ano dos proxectos de formación profesional dual.

Artigo 14. *Módulos profesionais xa superados ou validados*

1. O alumnado que teña superado ou validado un módulo profesional do ciclo formativo solicitado por ter realizado outro ciclo formativo ou ter acreditada algunha unidade de competencia deberá asistir á totalidade das actividades, profesionalizadoras ou formativas, que cumpra realizar na empresa.

CVE-DOG: uihg17e3-bcx4-hob5-5264-mk4ontnhwdz4



2. En materia de validacións observárase o establecido na súa normativa reguladora.

Artigo 15. *Protección de datos de carácter persoal*

De conformidade coa Lei orgánica 15/1999, do 13 decembro, de protección de datos de carácter persoal, os datos persoais recollidos na tramitación desta disposición, cuxo tratamento e publicación autorizan as persoas interesadas mediante a presentación das solicitudes, serán incluídos nun ficheiro denominado Alumnado, cuxo obxecto é xestionar este procedemento, así como para informar as persoas interesadas sobre o seu desenvolvemento. O órgano responsable deste ficheiro é a Secretaría Xeral Técnica da Consellería de Cultura, Educación e Ordenación Universitaria. Os dereitos de acceso, rectificación, cancelación e oposición poderanse exercer ante esta mesma secretaría xeral técnica, mediante o envío dunha comunicación ao seguinte enderezo: Consellería de Cultura, Educación e Ordenación Universitaria, Edificio Administrativo San Caetano, s/n, 15704 Santiago de Compostela, ou a través dun correo electrónico a sxtp@edu.xunta.es

Artigo 16. *Consentimentos e autorizacións*

1. A tramitación do procedemento require a verificación de datos en poder das administracións públicas. Polo tanto, os modelos de solicitude incluírán autorizacións expresas ao órgano xestor para realizar as comprobacións oportunas que acrediten a veracidade dos datos. No caso de que non se autorice o órgano xestor para realizar esta operación, deberán achegarse os documentos comprobantes dos datos nos termos exixidos polas normas reguladoras do procedemento.

2. As solicitudes das persoas interesadas deberán achegar os documentos ou informacións previstos nesta norma, salvo que estes xa estivesen en poder da Administración xeral e do sector público autonómico de Galicia; neste caso, as persoas interesadas poderán acollerse ao establecido na letra f) do artigo 35 da Lei 30/1992, do 26 de novembro, de réxime xurídico das administracións públicas e do procedemento administrativo común, sempre que se faga constar a data e o órgano ou a dependencia en que foron presentados ou, se é o caso, emitidos, e cando non transcorresen máis de cinco anos desde a finalización do procedemento ao que correspondan.

Nos supostos de imposibilidade material de obter o documento, o órgano competente poderá requirirle á persoa solicitante ou representante a súa presentación ou, no seu defecto, a acreditación por outros medios, dos requisitos a que se refire o documento con anterioridade á formulación da proposta de resolución.



Artigo 17. Modelos normalizados de formularios

Para calquera outro trámite distinto á presentación da solicitude, a sede electrónica da Xunta de Galicia ten á disposición das persoas interesadas unha serie de modelos normalizados dos trámites máis comunmente utilizados na tramitación administrativa, que poderán ser presentados en calquera dos lugares e rexistros establecidos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común.

Disposición adicional primeira. Proxectos de formación profesional dual autorizados con anterioridade

O alumnado dos proxectos de formación profesional dual autorizados con anterioridade e que se están a desenvolver poderá:

- a) Realizar a matrícula do módulo de formación en centros de traballo e o módulo de proxecto, de ser o caso, nas condicións que se recollen no punto 4 do artigo 12 desta orde.
- b) Cursar o módulo de proxecto dos ciclos formativos de grao superior nas condicións reguladas no artigo 13 desta orde.
- c) Solicitar as validacións de módulos profesionais e realizar as actividades profesionalizadoras ou formativas que cumpra realizar na empresa, nas condicións reguladas no artigo 14 desta orde.

Disposición adicional segunda. Prazas ofrecidas polo réxime de persoas adultas

Unha vez rematado o proceso de matrícula nos ciclos formativos no período extraordinario de setembro, no caso que o centro educativo tivese autorizados os mesmos módulos polo réxime para as persoas adultas que os autorizados no proxecto de formación profesional dual, poderanse adxudicar prazas polo réxime de persoas adultas, ata completar o número máximo de prazas que se ofrecen con carácter xeral para este tipo de ensino, ás persoas da listaxe de espera coa orde de prioridade establecida. Estas persoas recibirán a formación dos módulos profesionais do ciclo formativo exclusivamente no centro educativo co mesmo itinerario de formación que o establecido para o proxecto de formación profesional dual e poderán, se a empresa o considera e nas condicións que se determinen, incorporarse ao proxecto de formación profesional dual se houber algunha vacante.



Disposición adicional terceira. *Ordenación académica e avaliación do alumnado*

Todos os aspectos relativos á ordenación académica e á avaliación sobre formación profesional inicial non recollidos nesta orde rexeranse polas normas que con carácter xeral regulan as ensinanzas de formación profesional do sistema educativo.

Disposición derradeira primeira. *Desenvolvemento e execución*

Autorízase a Dirección Xeral de Educación, Formación Profesional e Innovación Educativa, e a Dirección Xeral de Centros e Recursos Humanos, para adoptaren as medidas precisas para a execución desta orde.

Disposición derradeira segunda. *Entrada en vigor*

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 6 de xuño de 2014

Jesús Vázquez Abad
Conselleiro de Cultura, Educación e Ordenación Universitaria

CVE-DOG: uihg17e3-bcx4-hob5-5264-mk4ontnhwdz4





XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA

ANEXO I

PROCEDEMENTO	CÓDIGO DO PROCEDEMENTO	DOCUMENTO
ADMISIÓN Á FORMACIÓN PROFESIONAL DUAL DO SISTEMA EDUCATIVO	ED513A	SOLICITUDE

DATOS DA PERSOA SOLICITANTE							
NOME	PRIMEIRO APELIDO	SEGUNDO APELIDO	NIF				
TIPO DE VÍA	NOME DA VÍA	NÚMERO	BLOQUE	ANDAR	PORTA		
CP	PROVINCIA	CONCELLO	LOCALIDADE				
TELÉFONO	FAX	ENDEREZO ELECTRÓNICO					

E, NA SÚA REPRESENTACIÓN (deberá acreditarse a representación fidedigna por calquera medio válido en dereito)							
NOME	PRIMEIRO APELIDO	SEGUNDO APELIDO	NIF				

ENDEREZO PARA OS EFECTOS DE NOTIFICACIÓN (non é necesario se coincide co anterior)							
TIPO DE VÍA	NOME DA VÍA	NÚMERO	BLOQUE	ANDAR	PORTA		
CP	PROVINCIA	CONCELLO	LOCALIDADE				
TELÉFONO	FAX	ENDEREZO ELECTRÓNICO					

DATOS BANCARIOS							
Declaro, baixo a miña responsabilidade, que son certos os datos consignados relativos á conta bancaria indicada.							
TITULAR DA CONTA				NÚMERO DA CONTA BANCARIA (24 DÍXITOS)			
				IBAN			

ENSINANZAS PARA AS CALES SOLICITA SER ADMITIDO			
CÓDIGO DO CENTRO	NOME DO CENTRO	CÓDIGO DO CICLO	CICLO FORMATIVO

A PERSOA SOLICITANTE OU REPRESENTANTE DECLARA	
PARA CICLOS FORMATIVOS DE GRAO MEDIO	
1. Que ten entre dezaseis e vinte e nove anos no momento de inicio do programa formativo.	
2. Que cumpre o requisito de acceso directo por (marque cun X a opción correspondente):	
☐ Graduado/a en ESO.	
☐ Técnico/a auxiliar.	
☐ Técnico/a.	
☐ Acceso por PCPI (Orde do 13 de xullo de 2011).	
☐ 2º curso do 1º ciclo experimental REM.	
☐ Das ensinanzas de artes aplicadas e oficios artísticos: 3º curso do plan de estudos de 1963 ou 2º curso de comúns experimental.	
☐ Algún dos requisitos de acceso a ciclos de grao superior. Marcar a opción que corresponda na epígrafe titulada "Para ciclos formativos de grao superior" (véxase máis abaixo).	
☐ Outros estudos declarados equivalentes (indicar cal):	
3. Que cumpre o requisito de acceso mediante proba (marque cun X a opción correspondente):	
☐ Proba de acceso aos ciclos formativos.	
☐ PAU para maiores de 25 anos.	
4. ☐ Que non cumpre o requisito xeral de acceso (unicamente no caso de que a convocatoria permita presentarse sen os requisitos de acceso).	

CVE-DOG: uihg17e3-bcx4-hob5-5264-mk4ontnhwdz4


XUNTA
DE GALICIA

ISSN1130-9229

Depósito legal C.494-1998

<http://www.xunta.es/diario-oficial-galicia>



XUNTA DE GALICIA
CONSELLERÍA DE CULTURA, EDUCACIÓN
E ORDENACIÓN UNIVERSITARIA

ANEXO I (continuación)

A PERSOA SOLICITANTE OU REPRESENTANTE DECLARA (continuación)

PARA CICLOS FORMATIVOS DE GRAO SUPERIOR

1. Que ten entre dezoito e vinte e nove anos no momento de inicio do programa formativo.

2. Que cumpre o requisito de acceso directo por (marque cun X a opción correspondente):

☐ Bacharelato establecido na Lei orgánica 2/2006, de educación.

☐ Bacharelato da LOXSE.

☐ Bacharelato experimental.

☐ Titulación universitaria ou equivalente.

☐ Curso de orientación universitaria ou preuniversitario.

☐ Técnico especialista, técnico superior ou equivalente para efectos académicos.

☐ Outros estudos declarados equivalentes (indicar cal):

3. Que cumpre o requisito de acceso mediante proba (marque cun X a opción correspondente):

☐ Proba de acceso aos ciclos formativos.

☐ PAU para maiores de 25 anos.

4. ☐ Que non cumpre o requisito xeral de acceso (unicamente no caso de que a convocatoria permita presentarse sen os requisitos de acceso).

PARA CICLOS FORMATIVOS DE GRAO MEDIO E DE GRAO SUPERIOR

5. Que non dispoño dunha cualificación profesional, obtida e recoñecida polo sistema de formación para o emprego ou do sistema educativo, requirida para concertar un contrato en prácticas para o posto de traballo ou a ocupación obxecto do proxecto.

6. Que non realice con anterioridade un contrato de formación e aprendizaxe, e cumpre os requisitos establecidos na normativa laboral vixente para poder efectualo.

7. Que non superei ningún módulo profesional do ciclo formativo do proxecto solicitado cursando previamente este ciclo formativo.

DOCUMENTACIÓN QUE SE PRESENTA

☐ Copia do DNI ou NIE, só no caso de non autorizar a súa consulta no Sistema de verificación de datos de identidade.

☐ Currículo co formato Europass.

REQUISITOS XERAIS DE ACCESO (marque cun X a opción correspondente):

Só no caso de non ter realizado os estudos ou as probas de acceso no ámbito da Comunidade Autónoma de Galicia, ao abeiro da Lei orgánica 2/2006, do 3 de maio, de educación, achegarse a documentación correspondente.

☐ Certificación académica en que conste o expediente académico e o depósito do título, de ser o caso (acceso directo).

☐ Certificado da superación da proba de acceso ao ciclo formativo (acceso mediante proba).

☐ Certificado da superación da proba de acceso á universidade para maiores de 25 anos (acceso mediante proba).

Autorizo a Consellería de Cultura, Educación e Ordenación Universitaria para consultar os datos de identidade da persoa solicitante no Sistema de verificación de datos de identidade do Ministerio de Facenda e Administracións Públicas, de conformidade co artigo 2 do Decreto 255/2008, do 23 de outubro, e a Orde da Consellería da Presidencia, Administracións Públicas e Xustiza, do 7 de xullo de 2009.

☒ SI ☐ NON (neste caso achegarse a documentación correspondente)

En cumprimento do disposto no artigo 5 da Lei orgánica 15/1999, do 13 de decembro, de protección de datos de carácter persoal, infórmaselle que os datos persoais que facilite neste formulario quedarán rexistrados nun ficheiro de titularidade da Xunta de Galicia, cuxa finalidade é a xestión e rexistro deste procedemento. A persoa interesada poderá exercer os dereitos de acceso, rectificación, cancelación e oposición ante a Secretaría Xeral Técnica da Consellería de Cultura, Educación e Ordenación Universitaria, como responsable do ficheiro, solicitándoo mediante o envío dun correo electrónico a sxfp@edu.xunta.es

LEXISLACIÓN APLICABLE

Orde do 6 de xuño de 2014 pola que se autorizan proxectos experimentais de formación profesional dual de ciclos formativos de formación profesional en centros educativos en colaboración con diversas entidades.

SINATURA DA PERSOA SOLICITANTE OU REPRESENTANTE

Lugar e data

, de de



Dirección do centro



UNIÓN EUROPEA
"Unha maneira de facer Europa"
"O FSE inviste no teu futuro"



**XUNTA
DE GALICIA**

ISSN1130-9229

Depósito legal C.494-1998

<http://www.xunta.es/diario-oficial-galicia>



ANEXO II

Centros educativos, ciclos formativos e entidades colaboradoras en que se autorizan os proxectos de formación profesional dual

Concello	Código de centro	Centro educativo	Código de ciclo	Ciclo formativo	Entidade colaboradora
A Coruña	15024513	CIFP Someso	MIMP02	Peiteado e cosmética capilar	Loida, S.A.
			MTMV02	Electromecánica de vehículos automóbiles	Asociación Provincial de Talleres de Reparación de Vehículos de A Coruña
Santiago de Compostela	15015767	CIFP Politécnico de Santiago	SIMA03	Mecatrónica industrial	Financiera Maderera, S.A. e Foresa Industrias Químicas del Noroeste, S.A.
			MTMV02	Electromecánica de vehículos automóbiles	Asociación Provincial de Talleres de Reparación de Vehículos de A Coruña
Ourense	32009131	IES Universidade Laboral	MTMV01	Carrozaría	Unidad de Vehículos Industriales, S.A.(Unvi)
Pontevedra	36020064	CIFP Carlos Oroza	SHOT04	Dirección de cociña	Arlea Hotels, S.L.U.
			SHOT05	Dirección de servizos en restauración	Arlea Hotels, S.L.U.
			SHOT01	Xestión de aloxamentos turísticos	Arlea Hotels, S.L.U.
Vigo	36017430	IES Ricardo Mella	SADG01	Administración e finanzas	Bosch Security Systems, S.A.U.
	36011579	IES A Guía	S06002	Xestión comercial e márketing	Media Markt Saturn Administración España, S.A.U.

ANEXO III

Plan de formación dos ciclos formativos autorizados para os proxectos de formación profesional dual

1. Ciclo formativo de grao medio de peiteado e cosmética capilar.

Curso 2014/15.

Código do módulo	Nome do módulo
MP0636	Estética de mans e pés
MP0640	Imaxe corporal e hábitos saudables
MP0842	Peiteados e recollidos
MP0853	Formación e orientación laboral



Curso 2015/16.

Código do módulo	Nome do módulo
MP0843	Coloración capilar
MP0845	Técnicas de corte do cabelo
MP0849	Análise capilar

Curso 2016/17.

Código do módulo	Nome do módulo
MP0643	Márketing e venda en imaxe persoal
MP0844	Cosmética para peiteado
MP0846	Cambios de forma permanente no cabelo
MP0848	Peiteado e estilismo masculino
MP0852	Empresa e iniciativa emprendedora

2. Ciclo formativo de grao medio de electromecánica de vehículos automóbiles.

Curso 2014/15.

Código do módulo	Nome do módulo
MP0260	Mecanizado básico
MP0455	Sistemas de transmisión e freada
MP0456	Sistemas de carga e arranque
MP0459	Formación e orientación laboral

Curso 2015/16.

Código do módulo	Nome do módulo
MP0454	Circuitos de fluídos, suspensión e dirección
MP0457	Circuitos eléctricos auxiliares do vehículo
MP0458	Sistemas de seguridade e confortabilidade

Curso 2016/17.

Código do módulo	Nome do módulo
MP0452	Motores
MP0453	Sistemas auxiliares do motor
MP0460	Empresa e iniciativa emprendedora

CVE-DOG: uihg17e3-bcx4-hob5-5264-mk4ontnhwdz4



3. Ciclo formativo de grao superior de mecatrónica industrial.

Curso 2014/15.

Código do módulo	Nome do módulo
MP0935	Sistemas mecánicos
MP0937	Sistemas eléctricos e electrónicos
MP0940	Representación gráfica de sistemas mecatrónicos

Curso 2015/16.

Código do módulo	Nome do módulo
MP0936	Sistemas hidráulicos e pneumáticos
MP0938	Elementos de máquinas
MP0939	Procesos de fabricación
MP0942	Procesos e xestión de mantemento e calidade

Curso 2016/17.

Código do módulo	Nome do módulo
MP0941	Configuración de sistemas mecatrónicos
MP0943	Integración de sistemas
MP0944	Simulación de sistemas mecatrónicos
MP0946	Formación e orientación laboral
MP0947	Empresa e iniciativa emprendedora

4. Ciclo formativo de grao medio de carrozaría.

Curso 2014/15.

Código do módulo	Nome do módulo
MP0254	Elementos amovibles
MP0256	Elementos fixos
MP0260	Mecanizado básico



Curso 2015/16.

Código do módulo	Nome do módulo
MP0255	Elementos metálicos e sintéticos
MP0258	Elementos estruturais do vehículo
MP0291	Formación e orientación laboral

Curso 2016/17.

Código do módulo	Nome do módulo
MP0257	Preparación de superficies
MP0259	Embelecemento de superficies
MP0460	Empresa e iniciativa emprendedora

5. Ciclo formativo de grao superior de dirección de cociña.

Curso 2014/15.

Código do módulo	Nome do módulo
MP0179	Inglés
MP0496	Control do aprovisionamento de materias primas
MP0497	Procesos de preelaboración e conservación en cociña
MP0499	Procesos de elaboración culinaria
MP0501	Xestión da calidade e da seguridade e a hixiene alimentarias
MP0506	Formación e orientación laboral

Curso 2015/16.

Código do módulo	Nome do módulo
MP0498	Elaboracións de pastelería e repostería en cociña
MP0500	Xestión da produción en cociña
MP0502	Gastronomía e nutrición
MP0503	Xestión administrativa e comercial en restauración
MP0504	Recursos humanos e dirección de equipos en restauración
MP0507	Empresa e iniciativa emprendedora



6. Ciclo formativo de grao superior de dirección de servizos en restauración.

Curso 2014/15.

Código do módulo	Nome do módulo
MP0179	Inglés
MP0496	Control do aprovisionamento de materias primas
MP0501	Xestión da calidade, e da seguridade e hixiene alimentarias
MP0509	Procesos de servizos en bar-cafetaría
MP0510	Procesos de servizos en restaurante
MP0514	Formación e orientación laboral

Curso 2015/16.

Código do módulo	Nome do módulo
MP0180	Segunda lingua estranxeira
MP0502	Gastronomía e nutrición
MP0503	Xestión administrativa e comercial en restauración
MP0504	Recursos humanos e dirección de equipos en restauración
MP0511	Sommelier
MP0512	Planificación e dirección de servizos e eventos en restauración
MP0515	Empresa e iniciativa emprendedora

7. Ciclo formativo de grao superior de xestión de aloxamentos turísticos.

Curso 2014/15.

Código do módulo	Nome do módulo
MP0173	Márketing turístico
MP0174	Dirección de aloxamentos turísticos
MP0175	Xestión do departamento de pisos
MP0176	Recepción e reservas
MP0179	Inglés
MP0182	Formación e orientación laboral



Curso 2015/16.

Código do módulo	Nome do módulo
MP0171	Estrutura do mercado turístico
MP0172	Protocolo e relacións públicas
MP0177	Recursos humanos no aloxamento
MP0178	Comercialización de eventos
MP0180	Segunda lingua estranxeira
MP0183	Empresa e iniciativa emprendedora

8. Ciclo formativo de grao superior de administración e finanzas.

Curso 2014/15.

Código do módulo	Nome do módulo
MP0647	Xestión da documentación xurídica e empresarial
MP0648	Recursos humanos e responsabilidade social corporativa
MP0649	Ofimática e proceso da información
MP0650	Proceso integral da actividade comercial

Curso 2015/16.

Código do módulo	Nome do módulo
MP0651	Comunicación e atención á clientela
MP0652	Xestión de recursos humanos
MP0653	Xestión financeira
MP0654	Contabilidade e fiscalidade

Curso 2016/17.

Código do módulo	Nome do módulo
MP0179	Inglés
MP0655	Xestión lóxística e comercial
MP0656	Simulación empresarial
MP0658	Formación e orientación laboral



9. Ciclo formativo de grao superior de xestión comercial e márketing.

Curso 2014/15.

Código do módulo	Nome do módulo
CS0087	Aplicacións informáticas de propósito xeral
CS0098	Lingua estranxeira (inglés)
CS0102	Márketing no punto de venda
CS0117	Xestión da compravenda

Curso 2015/16.

Código do módulo	Nome do módulo
CS0108	Políticas de márketing
CS0FOL	Formación e orientación laboral
CS0100	Loxística comercial
CS0097	Investigación comercial
CS0110	Proxecto integrado

